

## Inhalt

Unser Palz .....	7
Aus mir is was worre.....	12
Globalisierung.....	16
Herzlicher Glickwunsch .....	22
Die Kombi-Diät .....	26
Mer mäant s jo bloß gut.....	30
Ich bin jo so beliebt.....	34
Was mäanscht, wie s mir geht? .....	38
Mer muss redde mit de Leit.....	42
Die Elsbeth lebt nimmi .....	46
Is des e Wunner?.....	49
Muttertag.....	52
Gehet hin in Frieden .....	55
Pälzer Woihnachtsgruß.....	60
Uff mich heert jo käner .....	61
Ich hätt s jo aa gemacht.....	67
Ich hab en Draam .....	70
Ich kumm aus em Hemshof .....	73
Domols im Hemshof.....	77
Kennscht de Hemshof ... ..	82

## Unser Palz

He-a, lewen ihr aa so gern in de Palz? Also wann ich do net gebore wär, ich deet glatt herziehe. Welles annere Land hot dann soviel zu biede, frooch ich eich? Jedi Johreszeit hot do ihr Reize: Wann d im Friejhohr uff die Mandelbääm guckscht, do siehst doch alles wie durch e rosani Brill. En warmer Frieblingswind weht iwwers Land – un wanner net warm genuch weht, dann fahren die Baure enaus uff die Ägger un deggen alles ab – oin ganzes Land komplett unner Folie – a wu gibt s dann des noch?

Im Summer, wann s der zu hääß is, do gehst in de Pälzer Wald an äner vun denne viele versteckde See-e un schaltscht emol so rischdisch ab – zamme mit denne zwäähunnert annre, wu uff die gleich gut Idee kumme sin. A mir Pälzer sin schun e gsellisches Velksche, des glaabscht awwer. Un wann ich als heer: »Man kann auch unter vielen Menschen einsam sein!« Do saach ich: Awwer net in de Palz! Die Pälzer lossen der doch do gar kä Chance. Wie s Gewidder hoscht s Dubbeglas vum Nochber in de Hand un wehe du trinkscht net mit!

Un erscht im Spätjohr, des Bild, wann sich die Rewehäng rot färwen – a, do können die Amis mit ihm »Indian Summer« doch dehääm bleiwe. Wann dann die Daachespresse wie jeden Herbscht widder bekannt gibt, dass mer joo kä Trauwe in de Wingert klaue soll, weil die alle middeme hochgiftische

Spritzmittel iwwerzooche sin, dann wääß mer, jetz gibt s ball de erschde neie Woi.

Im Winder, wann de Schnee leis uff unser schääni Palz rieselt un ich hock dehääm in de warme Stubb un heer die Verkehrsmeldunge vum Grienstädter Berg – do denk ich mer jedes Mol ganz geriehart: Jetz werren do drauße widder Freundschaftde fers Lewe gschlosse – zwische Mercedes-Fahrer un Smart-Besitzer, zwische Generaldirekder un Bürobode, weil unner denne graue Degge vum THW middeme Deller Erbsesupp in de Hand sin alle gleich.

Awwer mir Pälzer machen do vun Haus aus schun kä Unnerschiede. Do isses egal, ob äner schwarz is odder weiß, reich odder arm, Moslem odder Hindu – nur Pälzisch sollt er halt redde, gell. Integration – saach ich do nur. Ich mäan, so Ernährungsasylande aus Norddeitschland, die losse mer schun roi in die Palz. Der Pälzer an sich is jo net kaltherzisch. Die hänn doch do drowwe nix Gscheits – kän Woi, kä Pälzer Lewerworscht, kän Saumaache un immer schlecht Wedder – a was issen des fer e Lewe? Awwer wammer die schun uffnehmen, dann kammer jo wohl wennigschdens erwarde, dass die unser Sprooch lernen, odder? Schließlich lewen die in unserm Land un mer will jo, dass die sich bei uns wohlfiehlen – nur ohne Pälzisch wern se des garandiert net. Oftmols gewwen die sich aa wirklich Miehe, awwer wann dann net mehr debei rauskummt wie: »Inner Falz geht der Farrer mit der Feife inne Kirche.« Des is halt e bissel wennisch!

Manche määnen aa unser Pälzisch wär so rubbisch un so ordinär – awwer des saachen die bloß ämol. Es is jo aa

wirklich net wohr. Des Pälzisch is äfach bloß gemietlich – so gemietlich wie die alde Wertschafde wu s iwwerall an de Woistroß gibt. Letschdens owends simmer mol widder in so äni gange, Moiner un ich. Schun die Hiefahrt war äfach en Genuss. Die Wingert rechts un links vun de Stroß, die kläne Heiselcher zwische de Rewe – des war so idyllisch, do hawwisch noch gedenkt: »Unser Palz, wie schää se doliggt.« Un glei druff hämmer se dann gsehe, die alt Straußwertschaft – ganz versteckt hinner e paar große Bääm. Die Owendsunn hot zwische de Blädder durchgeguckt un die letschde Veggel hänn gezwitschert. Dieser Friede, der wu do iwwer allem liggt – des iwwertraacht sich nadierlich aa uff die Mensche.

Alla, ich hab mer dann en Schobbe Riesling bestellt. Moiner hot e großes Wasser getrunke. Ich mään, äner muss jo fahre. Awwer ich saach immer, mer sin schun so lang verheirat, do is des prakdisch wie fer jeden en saure Schorle.

Aach, ihr glaawen gar net, wie ich des genosse hab, in dem alde Hof zu sitze mit Blick uff die Feigebääm – s war fascht noch so wie vor dreißisch Johr. Nur die viele Turischde! Des macht s halt alles e bissel schwierischer. Frieher bischt in e Wertschaft gange, hoscht geguckt, wu was frei is un hoscht dich dezu ghockt. Heitzedaach is die halb Palz reserviert. Un die meischde Leit verstehn dich jo gar nimmi, wann d pälzisch reddscht.

An dem Owend hänn am Newedisch aa so e paar Hochdeitsche gesse. Unser Werdin, die Kaddel, stellt denne

de Woi hie, der äände guckt uff des Glas, runzelt die Stern un saacht: »Fräulein, in diesem Wein ist Zucker.«

Do hääßt s immer, mir Pälzer wären so laut. In dem Moment war s schlaachardisch mucksmeiselstill im Lokal. Die Kaddel hot korz nooch Luft gschnappt un dann hot se ganz langsam un deutlich gsaat: »Das ist Woinschtoin. Das ist das Zeichen fier oinen besonderscht guten Woin.«

Un dann hodder de zwädde Fehler gemacht. Saacht der doch tatsächlich: »Mir könnse viel erzählen, junge Frau. Bringse mir man lieber n früsches Glass!«

Awwer mir Pälzer sin jo do net noochtraachend. Wu der Notarztwache mit dem Mann fort war, fünf Minudde später war die ganz Agelegenheit schun widder vergesse. Un die Veggel hänn weidergezwitchert un die Owendsunn hot all ihr Kraft in die letschde Strahle gelegt – bis der hinner uns am Disch e bisschen zu laut gsaat hot: »Also ich woiß net, was die an dem Pälzer Wei finde. Dr badische isch doch viel besser!«

Des war dann de zwädde Ausfall an dem Owend. Die Sunn is aa unnergange un s is uff ämol rischdisch kiehl worre – so maifrisch. Awwer nooch em dridde Schobbe merkscht des jo nimmi. Mir hänn dann noch e Klänischkeit gesse, e Pälzer Platt – fer die Auswärdische: Des is so e Art Mixed Pickles uff Pälzisch – do is alles druff, was de Pälzer gern isst. S is e bisschen fett als emol, awwer gschmacklich oinwandfrei. Wu ich grad so genisslich moi Brotworscht aschneid un des Fett laaft raus, kummt doch moin Hausarzt roi, guckt uff den Deller un mäant: »Glauben Sie, dass das

Ihren Leberwerten zuträglich ist?« He-a, mir wär fascht des letschde Stick Saumaache vun vorher im Hals stegge gebliwwe vor lauder Schreck. Awwer ich hab mich schnell widder gfange.

»Ooch«, hawwisch gsaat, »Herr Dokder, Sie wisse doch: ›Ämol gut gelebt, gedenkt em ewisch.« Mache se sich um mich kä Gedanke. Des Fett spiel ich noochher middeme Hefeschnaps nunner. Dann verdaut sich s leichder.«

Späder uff de Rickfahrt, wie ich so aus em Fenschder geguckt hab – die Rewe hänn im Schoiwerferlicht gedantz un e paar Elwetrutsche sin iwwer die Wingert Richtung Hambacher Schloss gerennt – do hawwisch gedenkt: Des gibt s halt bloß bei uns.

Awwer net, dasses jetz widder hääßt, die Pälzer määnen immer Wunner was mit ihrer Palz. Es gibt iwwerall herrliche Pläggelcher uff derre Welt. Des wisse mir schun.

Nur – ganz objekdiv betracht – in de Palz isses halt emol am Schänschde. A, do können mir Pälzer doch nix dezu, odder?

## Aus mir is was worre

**H**e-a, aus mir is was worre. Des hätt aa käner gedenkt, domols im Hemshof ...

Vor ugfähr drei Johr hot des agfange. Do hot mich moin Chef zu sich gerufe un hot gsaat: »Sie haben sehr gute Arbeit geleistet. Alle Achtung! Ich könnte Sie mir durchaus in einer höheren Position vorstellen, nur Ihr Outfit ...«

Do hawwisch die Jeanshose in de Schrank geraamt un hab mer drei Koschdiemcher gekaaft: in Dunkelgrien, dezendem Beige un Anthrazit – des wirkt immer elegant, hot die Verkäuferin gsaat.

»Hänn se dich jetzt soweit?«, hot moi Freundin gfroocht. Awwer ich hab gelacht un hab gsaat: »Jo, des sin doch bloß Klamodde! Des verännert doch net de Mensch!«

A - moin Chef, der hot sich gfräat. Der hot mer dann Rethorik-Kurse empfohle, dass ich lern iwwer nix zu redde, awwer dodevu viel un mit jedem. Er hot gsaat, des braucht mer, wammer Karriere mache will. In eme annere Kurs hänn se mer gezeigt, wie mer Hummer isst, un dass mer s Besteck vun auße nooch inne nimmt un so. S war schon intressant. Ich mäan, fer moi Freundin hawwisch do nadierlich kä Zeit mehr ghabt. Des waren jo alles Owendkurse. Awwer die hätt des sowieso net verstanne.

In derre Zeit war ich aa oft uff so After-Work-Partys. Des mit dem Hummer hawwisch do allerdings net gebraucht. Do

gibt s meischdens doch eher Hähncherbähncher – all you can eat, die Kategorie. Des kloore an so re After-Work-Party is, du braugscht dich net umzustelle. Du triffsch die gleiche Leit wie im Gschäft, die reddden iwwer die gleiche Sache – es is nur gut. Un du kannsch Kondakde knipfe, mit Heechere, wääsch, un die helfen der dann weiter nooch owwe.

Johoo, ich hätt mich schun als aa gern mit moingere Freundin getroffen, awwer helft mer des weider? Nää! Alla!

Un nooch em dridde Englischkurs hawwisch dann aa uff Gschäftsrräas gedirft. New York – Sao Paulo – hie un zurick.

In New York, do hawwisch den American Way of Life kennegelernt. Also des geht so: Jeder froocht dich, wie der s geht, awwer eigentlich intressiert s kä Sau un du muscht immer bloß saache: n’good - un bleed grinse. Des is so schää äfach. Bei uns, wann dich äner froocht, do muscht iwwerlegge, was verzehlscht dem, hoscht Vertraue zu em odder net – un do saagscht äfach: n’good.

In Sao Paulo, do braugscht des net. Do braugscht bloß en gude Maache fer des gebrodene Flääsch am Spieß un e gudi Lewwer un drei Sprich:

Erschdens: Also wer so ein Essen in der Churrascaria noch nicht erlebt hat, dem fehlt wirklich was.

Zwäddens: Mir is schon wieder nach em Caipi.

un Driddens: Mein Gott sind die Menschen hier arm. Da kann man ja froh sein, wenn man nicht entführt wird.

Uff so re Gschäftsrräas reddsch jo bloß englisch odder hochdeitsch. Jo, un dann hawwisch mer des Hochdeitsch aa fer dehääm agewähnt.



Es wirkt einfach viel professioneller. Nach der Reise hatte ich endlich ein bisschen Luft. Da hab ich auch meine Freundin mal wieder besucht und sie in ein Restaurant eingeladen. Aber – es war ein Desaster! Als ich ihr einen Prosecco als Aperitif vorgeschlagen habe, da sagt sie doch tatsächlich zu mir: »Ich hab frieher kä kläni Reblaus getrunke, no mach ich s heit aa net. Hoscht kä Geld fer en Riesling Sekt?«

Na ja. Ich hab ihr dann von der Reise erzählt und dass ich mein berufliches Spektrum entscheidend erweitert habe und was war ihre Reaktion?

»Hääßt des, du konnscht jetz nix mer rischdisch, redscht awwer iwwerall mit?«

Ich hab ihr das nicht übel genommen. Uns trennen einfach Welten. Der eine entwickelt sich eben weiter und der andere kann da nicht Schritt halten. Sie hat auch nicht verstanden, dass im Zeitalter der Globalisierung Flexibilität und Spontaneität gefragt sind. Erzählt sie mir doch, ihre Schwester sei mit dem dritten Kind schwanger und der Mann werde jetzt nach Leipzig versetzt und alles sei so schrecklich.

Da sag ich: »Das ist doch toll. Die sollen das doch als Chance nehmen. Der Mensch braucht Herausforderungen.«

Wie ich widder zu mer kumme bin, hawwisch erfahre, dass mer die Dekandierkarraff iwwer de Kopp ghaache hot. Ich hab nimmi gewisst, wer ich bin; awwer ich hab uff ämol widder pälzisch geredd.

Wu ich dann aus em Krankenhaus raus war, bin ich als erschdes durch de Hemshof geloffe, die alde Plätz suche. S war

schun troschtlos. S Leinerheisl is abgerisse, de Hemshofmarkt uffm Goerdelerplatz besteht bloß noch aus drei Ständ – un ob die Ficke Paula noch ihr Wertschaft hot, des hab ich mich gar nimmi getraut zu gugge.

Awwer vielleicht gibt s jo do in de Näh irgendwo noch so e rischdisch aldes Woilokal. Do deet ich jetz gern mit eich en Schobbe Riesling trinke.

Ich hab allerdings nicht viel Zeit. Ich muss heute noch auf'n Short Trip nach L.A., Teambuilding-Trainings, sorry.

Ja, sehner, aus mir is was worre. Ich wääß bloß net so recht, was.